

欽  
定  
全  
唐  
文

欽定全唐文卷二百三十一目錄

新文藝出版社藏書

張說 十一

唐玉泉寺大通禪師碑銘 并序

和麗妃神道碑銘奉勅撰

昭容上官氏碑銘

故太子少傅蘇公碑銘

故吏部侍郎元公碑銘

邠王府長史陰府君魏碑銘

唐故處士河南元公碑銘

周故通道館學士張府君墓誌銘

唐處士張府君墓誌銘

贈郎將葛君墓誌銘

恒州長史張府君墓誌銘

岐州刺史平原男陸君墓誌銘

元州司戶上柱國呂君墓誌銘

贈潘州刺史馮君墓誌銘

文昌左丞陸公墓誌

司屬主簿博陵崔訥妻劉氏墓誌銘

四門助教尹先生墓誌銘

鳳閣尹舍人墓銘

子曲阿令墓銘

徐氏子墓誌銘

欽定全唐文卷二百三十一

張說 十一

唐玉泉寺大通禪師碑銘 并序

譔夫總四大者成乎身矣立萬始者主乎心矣身是虛哉  
即身見空始同妙用心非實也觀心若幻乃等真如名數  
入焉妙本乖言說出焉真宗隱故如來有意傳要道力持  
至德萬劫而遙付法印一念而頓受佛身誰其宏之實大  
通禪師其人也禪師尊稱大通諱神秀本姓李陳留尉氏  
人也心洞九漏懸解先覺身長八尺秀眉大耳應王伯之

象合聖賢之度少爲諸生游問江表老莊元旨書易大義  
三乘經論四分律儀說通訓詁音參吳晉爛乎如襲孔翠  
玲然如振金玉既而獨鑒潛發多聞旁施逮知天命之年  
自拔人間之世企聞蘄州有忍禪師禪門之法允也自菩  
提達磨天竺東來以法傳惠可惠可傳僧璨僧璨傳道信  
道信傳宏忍繼明重跡相承五光乃不遠遐阻翻飛謁詣  
虛受與沃心懸會高悟與真乘同徹盡捐妄識湛見本心  
住寂滅境行無是處有師而成即燃燈佛所無依而說是  
空王法門服勤六年不捨晝夜大師歎曰東山之法盡在

秀矣命之洗足引之並坐於是涕辭而去退藏於密儀鳳  
中始隸玉泉名在僧錄寺東七里地坦山雄目之曰此正  
楞伽孤峯度門蘭若蔭松藉草吾將老焉雲從龍風從虎  
大道出賢人覩岐陽之地就者成都華陰之山學來如市  
未云多也後進得以拂三有超四禪昇堂七十味道三千  
不是過也爾其開法大略則慧念以息想極力以攝心其  
入也品均凡聖其到也行無前後趣定之前萬緣盡閉發  
慧之後一切皆如持奉楞伽近爲心要過此以往未之或  
知久視年中禪師春秋高矣詔請而來趺坐觀君肩輿上

殿屈萬乘而稽首洒九重而宴居傳聖道者不北面有盛德者無臣禮遂推爲兩京法主三帝國師仰佛日之再中慶優曇之一現混處都邑婉其祕旨每帝王分座后妃臨席鷓鷯四匝龍象三繞時熾炭待礦故對默而心降時診飢投味故告約而義領一雨溥霑於衆緣萬籟各吹於本分非夫安住無畏應變無方者孰能焉爾乎聖敬日崇朝恩代積當陽和會之所置寺曰度門尉氏先人之宅置寺曰報恩軾問名鄉表德非擬局厭誼輦長懷虛壑累乞還山旣聽中駐久矣衰憊無他患苦魄散神全形遺力謝神



龍二年二月二十八日夜中顧命跌坐泊如化滅禪師武  
德八年乙酉受具於天宮至是年丙午復終於此寺蓋僧  
臘八十矣生於隋末百有餘歲未嘗自言故人莫審其數  
也三界火心四部冰背攘崩梁壞雷動雨泣凡諸寶身生  
是金口故其喪也如執親焉詔使弔哀侯王歸贈三月二  
日冊諡大通展飾終之義禮也時厥五日假安闕塞緩及  
葬之期懷也宸駕臨訣至午橋王公悲送至伊水羽儀陳  
設至山龕仲秋旣望還詔乃下帝諾先許冥遂宿心太常  
卿鼓吹導引城門郎護監喪葬是日天子出龍門泣金襯

登高停蹕目盡迴輿自伊及江扶道哀候幡花百輦香雲  
千里維十月哉生魄明即舊居後岡安神起塔國錢嚴飾  
賜逾百萬巨鐘是先帝所鑄羣經是後皇所錫金榜御題  
華幡內造塔寺尊重遠稱標絕初禪師形解東洛相見南  
荆白霧積晦於禪山素蓮寄生於坐樹則雙林變色泗水  
逆流至人違代同符異感百日卒哭也在龍華寺設大會  
八千人度二十七人二祥練縞也咸就西明道場數如前會  
萬迴菩薩乞施後宮寶衣盈箱珍價敵國親舉寵費侑供  
巡香其廣福博因存沒如此日月逾邁榮落相推於戲法

子永戀宗極痛慈舟之遽失恨涌塔之遲開石城之歎也  
不孤廬山之碑焉可作竊比夫子貢之論夫子也生於天  
地不知天地之高厚飲於江海不知江海之廣深強名無  
迹以慰其心銘曰

額珠內隱匪指莫效心鏡外塵匪磨莫照海藏安靜風識  
牽樂不入度門孰探元要倬哉禪伯獨立天下功收密詣  
解却名假詣無所得解亦都捨月影空如現於悟者無量  
善衆爲父爲師露清熱惱光射昏疑冀將住世萬壽無期  
柰何過隙一朝去之嗟我門人憂心斷續進憶瞻仰退思

付囑盡不離定空非滅覺念茲在茲敢告無學

和麗妃神道碑銘奉勅撰

舊史云軒轅帝宮次星具黃龍之體郊媒神祀次妃成元  
鳥之命非聖也莫能法天非天也莫能感聖則有相乎坤  
而母乎震齊乎古而合乎天跡雖秘絕猶可測而言焉麗  
妃趙氏天水人也麗者以華美爲貴妃者以配合爲尊易  
云日月麗天傳稱星辰合度麗加妃號自我爲初原夫八  
駿勤周肇有封姓三軍霸晉乃蕃卿族設寶符而開國史  
珠履而成家果驗成宣之後不乏文忠之慶堯門昭殿何

代無人暨乎紫氣上通瑤臺獨立楚宮選美納良袂於神  
雲漢掖求才進團扇於明月故坐而論教則比位三司動  
而具瞻則儀刑六列者矣先將軍以恩澤授職太夫人以  
有禮封鄭流車躍馬豈無甲觀之親湫宅閑門不有椒房  
之勢採風揆化憂國如家故聖人有以尚其德也躬親蘭  
館義形熊檻退席以愛禮膠木以廣恩望古難臻之地必  
爲常踐之域故聖人有以嘉其志也懸象告沴經時寢疾  
在蒙被之辰荅還輦之問生可捐於浮假心獨係於元真  
神往土清願承恩而入道形歸下上期去禮而薄葬慈顏

同氣奚敢爲言皇上閱而許之咨嗟不已開元十四年春  
秋三十有四七月十四日薨於春華殿殯於龍興觀之精  
屋示以出家從道例也命河南尹監護河南令副焉喪葬  
務約成遺語也二十六日窆於故都之後邨山之陽孺慕  
承華淒涼薄室列薤歌於東路迴容衛於北山壽堂一閉  
兮凡聖等人代同悲兮修短間月帔雲衣旻以神仙之服  
上方陶籛旋於造化之初此皆聖主之曲成賢妃之本志  
何必雲陽山下別起通靈之臺未央宮中虛立致神之帳  
若夫易名之典考行是存帝諡曰和禮之貴也氣之和者

生萬物聲之和者孕八音魂而有知感聖恩乎有詔史臣  
恭銘內職事出彤管辭無華飾寫樂池之永傷寄瑤山之  
罔極銘曰

帝妃佐后實掌陰教八月選才千金聘貌禮獻絲蘭詩修  
澣濯婦政可尊嬪風胥效皎皎漢女爲皇降靈娥娥邗媛  
順道之經結以印綬華光後庭帶之弓鞬朗潤前星追述  
潛運夙承嘉獎謙苦中京崎嶇上黨金鏡開目明珠耀掌  
心方樂於時泰魂奄悲於化往紫雲衣兮霓裳送美人兮  
北邙白壤宮兮青松苑去君恩兮日遠秋風急兮霜天草

木黃兮野田滅香容於空槲留畫像於甘泉春秋以麗和  
之二字獨褒美於千年

昭容上官氏碑銘

天降時雨山川出雲乃生靈媛祚我聖君精微其道煥炳  
其文三光錯行昭容綱紀百揆繁會昭容條理外圖邦政  
內諭天子憂在進賢思求多士忠孝心感天焉報之吉凶  
有數邱焉禱之如彼九日拜焉暴之如彼三良秦焉悼之  
漢宮選才班氏其特楚史書霸樊姝之力或穆齊公敘其  
明德嗟爾彤管是鑒是則



故太子少傅蘇公碑銘

斤斤蘇公體正含道稟靈淳粹爲唐元老忠以衛主孝以  
立身文以經國惠以安人司牧九郡九郡爰靜平章百工  
百工爰整千載典憲三朝綱領上纂先人五代相國下垂  
餘慶七子令德帝謂庭碩伊公是似接待玉墀序拜金阡  
聯華疊潤佐我天子於戲彼蒼國幹云亡地頽五嶽天拆  
三光備禮詔葬羣官會喪掌史司德刊銘路傍

故吏部侍郎元公碑銘

英英白雲瑞彼君輅佻佻公子嘉我王度魏后遺德作華

天朝靈氣應變直心逍遙麟閣書仙鳳池墨妙太常國禮  
少宰邦教公之處之有倫有要玉折其貞金斷其清沒而  
不朽仁乎令名

邠王府長史陰府君碑銘

賢哉陰侯孝友仁信符彩外發清真內鎮史門文宗國子  
儒允克家踵武金聲玉振結髮筮仕利用勸心雉馴風化  
鹿賦文章函丈禮樂雷門紀綱微言教胄直道匡王年惟  
大耋克茂精爽疾不彌留怡然長往世比過隙生猶絕響  
契均范張會阻天壤通家自昔永懷厥初昏姻之故言就

我居富同鼎食窮共園蔬動心規戒言成著書奪我良友  
天其喪余南望龍門東都九原萬籟酸骨千霜斷魂琴瑟  
都盡墳笮半存葬收子壻碑傳外孫人生到此天道何言

唐故處士河南元公碣銘

嗟我處士煥炳其文精微天象與道爲隣頽乎萬化于三  
十春在昔薄葬時服幅巾厥孤克孝永懷遷神君其心之  
無違返真乃建豐碣追揚茂塵王門公路豈微朱輪天才  
海學于何窶貧心焉有主孰知我艱烈烈皇考求仁得仁  
哀哀王母斯恩斯勤李虔報養王褒感親退居更命喪禮

終身忠爲令德孝實至純一門二善千載不泯

周故通道館學士張府君墓誌銘

君諱弋字嵩之范陽方城人也其先張仲以孝友佐周子孫醜周仕晉相韓至留侯報韓仇秦興劉滅項爲漢世家九代及于漢亂居燕四葉爲晉司空混一天下司空生禕避胡過江六世至太常而復寓於河東之族人君即太常卿隆之曾孫徵君子犯之孫河東從事俊之子性倜儻尚氣節能引弓六鈞命中百步車服出入擬於封君州里頗患之君廼勵操強學不出門者十餘年探道覩奧鬱爲淵

藪周武帝聞之徵爲通道館學士旣入隋而面其國高尚  
厥志終於山廬嘗言夷齊清者非達伯鸞曠者非中優哉  
游哉吾不與也夫人某氏少而嫠居長而喪子流離世故  
窮盡艱危提攜女姓託身禪宇實有高行之烈隱居之風  
未遑歸葬有志不就遺恨終天降及曾孫追申情禮景龍  
三年歲次己酉十月十六日克葬曾王父曾王母於河東  
之普救原成先志也銘曰

皇矣烈祖才雄氣武不值漢高空思萬戶一旦折節十年  
學古高步華光飛纓書府昔有周處斬蛟契虎易暴以儒

異代同矩周命旣沒鼎遷于隋仕於二姓君子不爲昭昭  
盛德百代之規

唐處士張府君墓誌銘

府君諱恪其先晉人晉有張老韓有開地漢有留侯侯八  
代孫皓爲司空司空子宇爲北平太守遭漢亂離家於范  
陽至元孫華復爲晉司空遇難子孫南渡其處者或寓於  
蒲坂周齊間有歸者因從焉君晉司空十一代孫也曾祖  
徵君諱子犯祖河東郡從事諱俊父通道館學士諱弋德  
晉遺範詳諸家牒君孤紹單門傍無兄弟苗而不秀未仕

而卒道未融於邦國位未揚於王庭故老之口浸遠好事之書又闕是後生不得預聞焉哀哉嗣子晉州洪洞丞隲襁褓縵麻育於舅氏夫人隴西董氏常州長史雄之女也早年守義唯鞠一子嚴而有檢勤而善訓成先人之丕烈貽後嗣之積善微太夫人德則張氏幾將墜焉開耀元年十二月二十七日終於鄜城縣世婦馮氏之別業春秋七十有二先君之違世也太夫人在堂大門在殯日月逾邁有志未從是諸孫疾焉若履淵谷以景龍三年歲次己酉冬十月二十六日克葬王父王母於蒲坂東司空之村成

先志也銘曰

縣縣王父續我靈基幼而植德人莫知之烈烈王母克明  
克類教我鬻子光我族嗣中條之北大河之東邱陵桑梓  
鬱鬱崇崇千年啟室百歲來同永惟先志欽成厥終

贈郎將葛君墓誌銘

公諱威德字某曰葛氏本梁國寧陵人也因遷徙今居京  
兆涇陽縣父寶未仕早世公室無陶白之資朝無金張之  
援不承過庭之訓不漸鼓篋之術而能奮飛喬木獨拔深  
濟富忠孝而由己善射馭而聞天早以武藝妙選供奉每



扈游別館侍蹕禁林何嘗不左發五豸傍連雙兔歲久拜  
元城府左果毅都尉尋加上柱國入陪內仗思馬斯才出  
典外軍握兵之要所謂白珪特達青雲自致者也其用未  
展其生有涯神功二年某月日終於東都私第殯於北邙  
山之原夫人太原郡太夫人郭氏從夫有禮以子而貴開  
元八年十一月薨於京兆之修真里有子福順克家用孝  
開國惟忠泣風樹之不追痛榮祿之不逮哀戚之情上感  
飾終之澤下流窀穸有期祖奠將設有詔贈右驍衛郎將  
開元九年二月七日合葬於長安縣龍首鄉禮也鬱鬱宰

樹蒼蒼墓田恐佳城之見日祕銘石於重泉詞曰

都尉武達夫人禮封令德高行譽偶名雙自古迄今仁賢

同盡惟傳忠孝餘慶不泯

恒州長史張府君墓誌銘

君諱承休字某吳郡吳人也留侯興漢播美西京長沙徙

吳蔽蔓東土曾祖沖在陳為文帝師入隋為漢王學士祖

後允授經太宗尊之以祭酒既封新野又贈以宗伯考少

師位不充量止於朱陽宰班固稱世名忠孝魏武謂積善

之家昌門一系暉我諸族君受天戩穀傳家業藝希言敦

行去華崇實非法不由非禮不動精於理物敏於政事初以南郊齋郎補充州兵曹丁太夫人憂廬墓三年加人一等再任始州司倉應八科舉改鄭州錄事參軍又舉賢良方正遷揚州司錄參軍移蘇州常熟令厯政皆有能名加朝散大夫入爲司農丞實掌錢穀姦僦息望使覆囚嶺南是司獄訟聽折惟允廼授濟源令風行畿甸河潤洛師加朝議大夫上柱國拜隆州司馬轉恒州長史簡而有孚權而中道嬰風恙去職就醫還京春秋六十有二終於頌政里夫人成紀郡君天水秦氏廬陵郡公行師之孫嗣公遊

福之女敬事君子誠訓諸孤當代之孟母也年六十二終  
於許州開元九年十月某日合葬於武功之禮讓原禮也  
夫道大難合仕屯而不進德高有後身沒而福流君同生  
八人半服銀艾祚允五子率爲珪璋比迹於燉煌六龍南  
鄭千室德門濟美信有徵乎懼陵谷或遷乃勒銘沈石銘  
曰  
思文留侯時惟皇祖長沙南守分幹東土家有道書門傳  
相府嵬莪重世通經二主誕靈上哲克廣斯文造次仁義  
優游典墳孝乎事親忠乎事君猗那叔父亦足有云

岐州刺史平原男陸君墓誌銘

開元十三年十一月六日故岐州刺史平原男陸公卒於京師十四年冬十一月葬於鄴西之先塋公諱伯玉字某河南人識真之士也夫譽其克家光乎觀國篤慈惠以宰邑宏雅量以執憲擅華妙於禮闈敷文敏於禁掖推直方以獨坐率易簡以專城所居而美風振所莅而德聲溢非德充於內而美形乎外者焉若是夫孝盡愛敬之衷悌包友順之節仁協返身之恕義適成物之和四者禮之善物歟吾友嘗從事於斯矣然而舉禮之綱持心之柄靜則樂

先王之道動則濟賢人之業位不盈量年無登壽之才也  
之命也復焉可得而言哉銘曰

陸侯泉妙體曠心古龍章炳文麟角藏武彙籥沖用詩書  
義府移孝則忠安親合主乃建侯社乃牧王畿有嚴有翼  
有長有威汲直謝病秦和不醫乞言未老啟手全歸石鼓  
東臨銅臺西望別業宛在舊塋增創弱子攀車孀妻送葬  
風景飄忽山川惆悵令德可傳浮生匪重神去一息形遺

萬種露往草陳霜來樹拱

闕二

仁兮

闕

義長蕪沒於邱隴

元州司戶上柱國呂君墓誌銘

公諱虔字某其先東平人也堯之太嶽始封呂侯周之太師實表齊國河西則霸王繼代關東則丞相聯華近徙河間是稱右族大父贊隋幽州都督府長史考師滄州青池令並振羽儀馳聲郡邑公孝悌天至福祿混成千里聞騏驥之才五都重琅玕之價壯士行去樹勲於塞垣君子居之何陋於蕃郡以上柱國爲元州司戶參軍積善襲於家風餘慶流於身後享年若干而卒夫人河清縣太君傅氏四德爰備六行聿修始則賓於冀妻終則訓成孟母春秋若干而終開元十四年某月合葬於州城西南里之平原

禮也我有令子職司馬於小山我有淑孫偶乘龍於大樹  
榮哀之事於茲畢矣銘曰

堂堂呂公休有令德穆穆傅母順成內則兩譽齊振雙儀  
不忒景行山東風流河北有生必謝誰能獨存神寧故里  
合葬平原劔暗泉室松寒墓門勒銘沈礎萬古何言

贈潘州刺史馮君墓誌銘

公諱君衡字正平廣管高州人也昔畢萬苗裔邑於馮城  
因以爲氏其適越者則袁宏過江錄所載長樂馮祖思之  
後也遠居僻地代爲右族帶甲千人擬四豪之公子田洞



百里齊萬戶之封君祖盎持節總管高州都督耿國公薨  
贈左驍衛大將軍荊州大都督恩命分府爲三州授君之  
三子子智弒高州刺史子智玳恩州刺史猶子子猷潘州  
刺史公荊州之孫恩州之子量包山海氣逸風雲陰德以  
濟物力行以游道散岸從心乘化而沒斯寔一方超邁全  
真之士也夫人南海郡太夫人麥氏誕嫗勲門作嬪傑室  
初執冀妻之禮終抗梁寡之行即大將軍宿國猛公鐵杖  
之曾孫女也夫人有三子一女同歸上京長子元璣左衛  
中候次子元珪左領軍衛郎將少子力士右監門衛大將

軍以將軍少養於高氏故舉家從其姓焉夫德厚者福長  
先否者終泰天之報應豈虛也哉大將軍所以雲漢奮飛  
忠孝至感迎聖善於炎海展三牲之色養拔友于於荒徼  
會四烏之嚶鳴縉紳美談簪紱傾慕是知敬仲羈旅將育  
於齊孟軻儒藝成名此母信瑰才之特達亦餘慶之助成  
乎夫人享年八十有七開元十七年五月十二日薨於西  
京來庭里粵八月二十二日安厝於長樂原之新城閔將  
軍之純至嘉先士之晦名恩詔追贈潘州刺史招魂而合  
葬焉蓋殊常之禮若夫慈以遺後孝以揚親忠能合聖惠

足昭仁嗟乎馮氏之子具此四德鏤石垂文爲不朽矣銘  
曰

潘州遠世滅迹沈彩詔贈本邦光燦南海其孤永慕昊天  
不逮夫人處順奄背榮允悲離兩鄉魂合雙櫬孝心可贈  
百年匪愴天日蒼蒼邱隴茫茫地名長樂人樂無長郭門  
之外愁生白楊

文昌左丞陸公墓誌

公諱元方字希仲蘇州吳縣人也帝典惟二虞盡美於南  
風強國有七齊莫大於東海元侯制食因而爲宗丞相冊

勲開吳佐命盛德之後瑤琨代襲故丹青奕世三君之望  
並高金玉聯華五常之目齊重公即陳給事黃門侍郎琛  
之曾孫唐荊州當陽縣丞山仁之孫司儀郎東之之姪豫  
章尉元之之子體元黃之純粹峻清白之隆名鵬翼載軒  
騏鳴自遠始以司成明經業優擢第補三水扶風渭南三  
縣尉授裏行監察殿中三御史遷鳳閣舍人兼太子中舍  
又判鳳閣又守秋官行鸞臺三守侍郎同鳳閣鸞臺平章  
事坐公事降爲綏州刺史居無何檢校春官又試天官二  
侍郎兼司尉卿復除鸞臺侍郎同鳳閣鸞臺平章事轉右

庶子轉文昌左丞前後掌選及知考各二歲九流銓總代  
天理物公執其衡鏡而野無遺賢三載考績惟王舊典公  
秩其幽明而庶官咸事斯並憲章臺閣籍甚人倫至於經  
濟大道彌綸庶務嘉猷削於隱德宏益晦於推美蓋不得  
而聞也古人有言進退在命忠信在人一出持州再入莅  
政汲長孺之方直時守外臺胡伯始之詳明亟司中禁抑  
有由焉嗚呼人之淑斯宜享難老昊天降戾曾不憖遺大  
足元年二月七日寢疾而終春秋六十有三歷事兩宮三  
十餘載奉上惟敬臨下惟誠密勿兩終靜而調理心尚坦

率不違名教之地迹列軒裳不雜風塵之伍施與忘倦鄉黨穆焉夷險若一朋友義焉所謂終溫且惠行同歸於大雅克己復禮身不離於令名及東首歸全西階徹奠無食粟之馬無衣帛之妾知與不知莫不嘉歎粵三月十四日假葬於國門之南費村永刊昭烈垂之幽礎

司屬主簿博陵崔訥妻劉氏墓誌銘

夫人劉氏其先彭城人也隋毗陵郡通守子將之曾孫唐滁州刺史德祖之孫汾州刺史延嗣之女也昔武子處秦厥初令氏元王國楚是爲昌族盛德之門龍驥接彩世祿

之冑龜武聯華夫人璇室載蘭蕙林曾秀喈喈黃鳥艷艷  
清明聞詩聞禮竊比諸生茂行淵心實稱士女及鳳飛啟  
繇夫婦盡琴瑟之和鷄鳴咸纏舅姑移喬梓之敬友愛洽  
乎妯娌任恤周乎姻戚豈惟禮備澄慕工深機杼固以能  
循法度宜其室家矣年若干以大足元年七月某日寢疾  
而卒粵二十九日某辰假葬於某里夫國喪賢嬪家亡淑  
媛母氏垂白頻奪所懷稚子始孩翦焉無倚嗚呼天道輔  
仁人道與順眷茲大德不遐三壽何哉報應之理豈神食  
其言修短之期將事歸於命外姻畢萃累歎不定夫人即

吾姨也今薄譔素履永刊幽石圖史之外有美存焉其銘

曰

崔實齊胄劉亦漢宗崇其顯媿望偶族雙閭闡是穆饋奠  
斯恭貞歌浮漢孝室洞江珪璋其節桃李其容宜享偕老  
胡寧鞠凶朝槿飛陌春蘿墜松夫傷子慕去此何從百歲  
之後魂兮合封

四門助教尹先生墓誌銘

先生諱守貞天水冀人蓋好學博古者也本乎官族稱爲  
尹氏昔有尹佚司周太史暨乃吉甫勤於宣王格言大勳



布在詩傳遠祖緯魏僕射曾祖欣隋開府大父珍唐棣州  
蒲臺令父文唐通州三岡令先生積德餘慶天錫純嘏愿  
而克恭情與禮合七歲誦爾雅能通書契訓詁之義識草  
木鳥獸之名十五誦三禮能明君臣父子之道定郊廟吉  
凶之制二十誦春秋尚書能精五行九疇之數斷褒貶會  
盟之節二十五誦詩及易能辨政教雅頌之始極變化生  
生之至又能誦古史百家之書善文章草隸之則恥夫流  
俗背實嚮聲飾華褻末故每外和內厲元元本本學者如  
斯不舍晝夜垂拱四年以明經高第遂授大成自延載之

後條限賓薦長安之初大開貢舉考功是歲千五百餘人  
召先生課覈淑慝時稱無滯矣天子聞其進通經術乃下  
制曰成均大成尹守貞業隆時習功宣日就既有勵於分  
陰俾參榮於杖席可四門助教詵詵青襟有所仰矣長安  
二年六月十日晝寢忽夢麟臺兩局爭召修文覺而歎曰  
十二日稷吾當往矣因命親族序訣至日安枕俟期俄然  
而卒春秋四十可謂古之達化知命者也嗚呼天與之德  
而不永其年天與之才而不大其位何乎粵七月十七日  
葬於高陽原先君之舊塋銘曰

尹氏之子其殆庶幾爲仁由已三月不違謙成德柄學也  
身基辟雍洋洋可以療饑環林之下可以棲遲我實道貴  
人言位微修文地下前哲同歸子之知命將歿先期朝衣  
東首精魂高飛人之云亡胡不悽而高陽之原有陴其側  
郭門直視松柏一色邱隴纍纍阡陌誰識浮焉休焉爲我  
心惻

鳳閣尹舍人墓銘

峨峨尹氏太古之始發源堯師中葉周卿爰暨初考咸有  
頌聲猗歟府君代烈增盛孝行之本謙德之柄耽樂道真

含光無競三典郡土五行以正再司府丞百工興詠茫茫  
大造物生遂性虛無宰之孰能力爭位不充德優游天命  
身沒道存同符孔聖是有才子克成餘慶

子曲阿令墓銘

存爲神鑑歿爲國殤惟呂惟子同歸義方

徐氏子墓誌銘

徐氏子者名巖字某司封員外郎堅之第四子也驥子睨  
雲鳳毛洗日孝友因心聰敏若神置在膝前已會星辰之  
氣戲於牀下能記賓主之詞及總角成童精意好學問一

知十升堂觀奧下筆成章而倫要發言爲論而卓詭識者  
咸謂增世構之崇蘊益源流之洪潤雖甘茂之孫十二飛  
辯班彪之子九歲能文不尚之也天乎何辜顏項無命年  
十有三歲大足元年九月遭疾而沒嗚呼哀哉瑀月始生  
不見其盈瓊枝方秀不見其茂悲哉銘曰

生日何淺死路何深珠碎朧月花殘稚林哀哀父母孰處  
其心

欽定全唐文卷二百三十二目錄

張說 十二

府君墓誌銘

李氏張夫人墓誌銘

上邽縣君李氏墓誌銘

滎陽夫人鄭氏墓誌銘

右豹韜衛大將軍贈益州大都督汝陽公獨孤公

燕郡夫人李氏墓誌銘

鄧國夫人墓銘

張氏女墓誌銘

中書令逍遙公墓誌銘

唐故左庶子贈幽州都督元府君墓誌銘

節愍太子妃楊氏墓誌銘

唐故涼州長史元君石柱銘

并序

欽定全唐文卷二百三十二

張說 十二

府君墓誌銘

府君諱隲字成隲姓張氏其先晉人也晉分家世相韓韓  
滅留侯爲漢謀主至宇爲范陽太守因居其郡及華博物  
亞聖爲晉司空府君司空十二代孫也曾祖諱俊河東從  
事大父諱弋字嵩之通道館學士考諱恪未仕即世先君  
四代早孤單門瑩立宗祀之不絕如綫府君襁褓哀麻鞠  
育舅氏而炳太和之純嘏爍遠慶之洪允庇身禮樂發言



忠信小無不戒大無不慎終日乾乾遠於悔愆靈根顛而  
還植祖德墜而復振加以好學不倦問一反二道機元鍵  
罔不幽探外王父大理丞某重世爲士府君傳其憲章博  
施精理年十九明法擢第解褐饒陽尉丁王母憂去職夫  
人少而守義老而無子因心創巨事不忍言喪紀之數加  
人一等服闋調長子尉換介休主簿洪洞丞太夫人在堂  
官求近便故累徙而不進也內清淨以化人外平反以悅  
親不樂歸美而善隱德故下車無赫赫之聲所去有遺愛  
之戀有旨差覆囚山南輜軒所歷全濟甚衆府君以律有

違經背禮著妨難十九篇書奏帝下有司而刪定之官黨  
同妒異竟寢其議道之將廢也歟命也臧倉其如命何調  
露元年秋奉使晉陽遇疾輦歸藥禱無降冬十二月大漸  
九日乙卯棄背於縣廨春秋五十有二光珪說不天總角  
在疚明年春奉轉藁殯於河東賴夫人撫養孤藐躬加訓  
授男習文雅女工組繡姻不失親官復其舊景龍元年秋  
封長樂縣太君夫人故藍田丞威之女也享年七十有二  
是歲十一月戊申傾背於東都康俗里第於戲哀哉靡瞻  
靡依何怙何恃二年七月己酉克葬我先公夫人合祔焉

從周制也初議葬小子夢度景於萬安山南孤堆東峯之  
下時淮南宏公相地曰是山爲華蓋岡爲蟠龍龍者大人  
之德孤者王侯之稱卜夢協兆何善如之乃定墳塋初宅  
茲所小子銜恤誌之幽礎係曰

欽若古訓時惟皇考翕和三光希聖二老清有世業儉爲  
身寶彌綸典憲思緝王道佐彼四邑人用不擾生我曷後  
棄我曷早閔予髻髮遭家不造鴟鳩在桑其子在棘母氏  
聖善示我顯則命服天朝封邑舊國榮未卒歲哀已匝域  
泣血思親昊天罔極孤之華蓋土龍蟠連岡四遶帶林巒

朝日吐耀遠峯攢微風夕發過蕙蘭石室固護泉火寒衆  
靈幽謁奉神歡壽宮深靜永閑安

李氏張夫人墓誌銘

臨淄李伯魚妻者范陽張氏女諱德性孝悌柔婉能日誦  
數千言習禮明詩達音妙績德言容工蓋出人也伯魚天  
下善爲文擢校書郎出爲青州司功而卒夫人寡居無子  
以歸宗焉長安二年四十有八傾逝於康俗里殯於永通  
門外景龍三年家疲居貧季弟說鬻詞取給冬十月安厝  
伯姊於萬安山陽蒼梧不從古之制也北望先隴西接妹

金史卷之三十一  
邱明靈其嘉永安此室銜哀敘誌嗚呼孔懷銘曰  
送我伯姊萬安之墳精靈何處爲雨爲雲彼臨淄兮千里  
望倏忽兮夫君

上邽縣君李氏墓誌銘

夫人太祖景皇帝之元孫西平郡王普定之女也賦靈陰  
德資性柔嘉事舅姑盡其敬與姊姒致其睦茂行充乎內  
則懿聲溢於外姻雖幼育王家長自傅保而能謙光庶類  
降心細物手成朝祭之服躬操酒食之品凡婦人之所能  
事而夫人莫不備焉府君朱紱之歲也於是乎始受封邑

象服盈門魚軒在路姬氏王者之後夫人帝室之親夫貴  
婦榮於斯爲盛及帷堂而哭有敬姜之禮擇鄰而處有孟  
母之教入閭俟信有諸婦之期出言成章有衆女之誠受  
命不淑以某年月日卒於同州之私第以神龍元年十一  
月二十日合葬於萬年縣白鹿之舊塋有子孫殿中侍御  
史檢身承家揚名爲孝思我母氏感秦伯之詩附於府君  
取周公之禮髣髴心跡志之幽石其銘曰

茫茫萬姓朝宗於李婺星分極咸池派水后稷裔孫神貽  
女士動遵法度居觀圖史輔佐哲夫訓成賢子宜崇徽號

以享介祉高堂奄空霜露方始儉用禮節葬非奢美鏡下  
窆臺衣緘泉笥壠煙不散松風長起摘果人迷侵林獸死  
永言惟孝事親終矣

滎陽夫人鄭氏墓誌銘

夫人諱某字某滎陽開封鄭氏之女也有唐銀青光祿大  
夫行少詹事博陵侯崔氏之妻中大夫中書舍人湜之母  
也高祖述祖北齊吏部尚書太子太保滎陽平簡公曾祖  
武叔北齊洛州刺史中牟公祖道援隋宋城令父世基故  
吉陽令故左僕射安吉公杜淹太夫人之外王父也夫人

家世德門母氏鼎胄衣冠禮樂耳目所徵號之諸生實爲  
女士先夫人以崔出泰岳之允鄭祖周王之穆長源修麓  
比濬聯崇故夫人年十有七歸於我氏盡敬愛以安舅姑  
致友穆以諧娣姒性寬恕尚素雅文而不奢約而不陋故  
邑號光啟象服是宜博陵侯更事兩朝多歷官序居必大  
理去有遺愛雖毳衣善聽得非鷄鳴之弼乎舍人及三弟  
長安尉泌藍田尉液左千牛滌咸有當代之名立無過之  
地滋液德教琢磨禮範雖趨庭善稟得非闕門之誨乎夫  
樂得好逑關雎義也鞠成衆子鳴鳩仁也采蘋采藻修禮



度也如山如河有德容也婦禮既成內則用貞母儀乃行  
家道以寧於是春秋高矣雅好真諦厭斲禪味減徹珍華  
被服慈衣捐斥文繡總斯羣懿式是六姻故以嗣徽先姑  
垂裕來史詩所謂邦之媛也夫人有焉皇天難忱不享偕  
老年六十四神龍元年十一月九日遘疾終於洛陽之遵  
化里其明年二月某日葬於富平縣之某原君侯傷神諸  
子銜恤置銘幽窆用存終古其詞曰

東惟詹府西望綸闈吾夫鸚麟吾子鷓飛青綬赤芾魚軒  
翟衣喬梓構基堂堂榮暉如何不淑奄永泉扉漠漠元夜

溶溶白日百歲之後同乎此室

右豹韜衛大將軍贈益州大都督汝陽公獨孤公

燕郡夫人李氏墓誌銘

夫人諱某字某故代州東治府右勇毅都尉幽州高士李感之女也本姓張居於清河郡大父元愨官至安東大都護長史與太宗有故賜姓李氏仕歷澶州司馬始家薊城是則帝寵舊臣乃命王族官平朔野因爲郡人偉哉孝友清白之仁基金鈎石印之靈慶必將光大別族繁衍淑女彩黛紛敷焜燿華美若斯之盛也夫人幼而韶異長而婉

穆金聲玉澤薜榮蘭茂傳賢莊姜詩美仲氏無以尚也初  
汝陽公夫人元氏生一男四女而卒繼室以夫人封諸燕  
郡王元生立及長孫楊氏二女秉螽斯宜爾之德著鳴鳩  
均養之仁色無偏和心無殊厚閨庭之內邕邕如也雖邑  
中五服之家門下三千之客莫能察其異焉永寧里先人  
之舊廬也有通渠轉池巨石嶽巖噴險淙澗洄潭沈沈殊  
聲異狀而爲形勝遊行之處者十四五前夫人之孫蘇氏  
之婦弱歲嬉而墮焉舉家環流憚莫能救夫人投身赴水  
或沈或浮久之提挈僅免其行已也實多此類府君更郎

將中郎將各一將軍大將軍凡四前後領左右羽林二軍  
禁營青海鴨綠二道總管天子元老白首兵欄腹心爪牙  
朝無與二外受琫戈文馬之賞內委金璣寶貝之飾將軍  
既頒於部曲夫人亦散於宗姻可謂貴而好禮富而能惠  
者已及君子晨歌夫人晝哭喪有過戚制無越禮其後法  
吏苛禮令子遠遷窮荒一訣倚閭三歲炎山瘴海曷云其  
來施珍玩以奉佛徹滋味以奉道精意入冥明神與直中  
興昌歷無廢舊勲先公茂乎飾終愛子榮乎起滯天步方  
泰家屯適夷宜享南山之壽奄頓西泉之駕神龍元年十

二月二十二日寢疾終於洛陽之德懋里春秋若干國墜  
邦媛宗傾母儀孤允孝孫哀哀藥棘有詔旨曰獨孤某妻  
亡還京日宜給靈輿并遞悼舊喪德矜孤恤喪朝之大經  
者粵以明年十一月二十日卜葬於雍州之某原不從先  
塋古之道也夫計功伐勒彝鼎非婦人之事撰德行存國  
史亦孝子之志乃爲銘曰

猗嗟昌兮月出之光如葉莫莫如華皇皇宜啟燕郡作合  
汝陽尊之象服錦衣褰裳以慈行訓曰仁之綱以命易難  
曰義之方婦有柔德亦惟其常女之士行于何不臧彼天

蒼蒼胡降百殃捨我媚子捐其高堂邱壠芒芒風生白楊  
象物皆盡德音不忘

鄧國夫人墓銘

詩美莊姜傳稱孟母庶幾繇邈千載時有猗嗟邦媛柔明  
亶厚龜玉毀積膏蘭天壽遠矣皇祖肇自伯宗靈基在晉  
華胄陵江尹茲西楚宅是南邦高蓋結轍圓冠比蹤魏館  
虛待周京長發父對雄風母膺姊月珠浦瀆潤玉林清越  
昆弟三人羽儀雙闕家芬淑女國茂賢妃具瞻四德旁通  
八徽步幃馳辨連環定機調絃魚躍弄杼鴛飛媧后創業

軒宮多事高行登聞大家入侍幽贊日月財成天地温室  
不傳平城盡祕大君命我變禮斷恩衛妻空誓息媯無言  
均養七子劬勞二門始賦樛木終歌采蘋多難啟聖羣凶  
搆孽朋家作仇脅權相滅臨禍不懼忘生蹈節彼何人斯  
碎此貞烈氛消日朗旣安且平皇心震悼禮備哀榮啟國  
加等復土陳兵外姻來唁中使臨塋恭惟夫人宿精智刃  
昭昭開士授之心印古無合葬遺言別墳藥藥孝子敢廢  
前聞服不珍繡盤無鳳薰室暗泉火松殘隴雲神合大化  
誰爲小君

張氏女墓誌銘

女郎名炎姓張氏洪洞丞府君之少女也聰慧孝友蘓條  
鬢暫能讀史書善奏絲桐舉族珍之未成人而天命也聖  
歷中隨仲昆之任殞折於慶州歸殯於藍田別業景龍年  
屬家艱季兄說徵黃門侍郎哀請不拜詔許終服家貧傭  
文以取資冬十月獲葬女弟於萬安山陽差池姊瑩顧瞻  
尊闕不忘孝弟慰爾幽魂含酸屬銘投筆氣索詞曰  
陟彼京兮痛同生兮柰何朝露在薜榮兮共天地之大德  
焉早落而無成兮



中書令逍遙公墓誌銘

唐故中書令逍遙公韋氏諱嗣立字延構京兆杜陵人也  
受渾元之正性挺生人之秀傑門爲孝悌之府世處台衡  
之地蓋士林之高標宗臣之首出者也生於秦之清水長  
於鄭之成臯聰明先覺博古兼覽究蓬山之百氏綜闕里  
之六藝文而不華實而不滯原夫志在於易行在於禮守  
橐籥之沖虛播朱絃之愷悌事有則而言有度神無方而  
用無體其與人也溫良善誘仁恕多容俾夫頑蔽開析復  
驚擾從君子進道小人革慮聞者願來見者忘去若膏澤

之浸陽和之感萬物不知其化矣及夫覆篲登朝濫觴宰  
邑聖朝知其周慎忠肅簡易循良是以綢繆兩禁重疊千  
里迄踐宰衡終厥有成凡化二邑理七郡三入中書再統  
兵部選兵吏各兩冬典樞密共五載光弼四主厯政三十  
有餘其間累有謗及官因左退日月蝕而更明隨和幽而  
不昧爾其爲邦設教遵德閑邪身勤心苦誠感物化禮讓  
興於私室刑罰廢於公家衡鏡高懸文武矯首才無我失  
善若已有風流名教作法垂後訐謨皇極功格天地茫茫  
蠢蠢旣生旣遂四夷來王五靈皆至然而外榮中素迹邇

心遐杳然朱戶之若喪邈矣赤松之可接西宴驪山之谷  
東息龍池之野擇逍遙而建號裂土宇而開社即明主封  
立帝之謀表高臣之志也公考侍冲爲國元輔公兄承慶  
當代齊名咸以令德繼和金鼎扶陽二相陳氏三君復追  
美矣侍中前夫人崔氏生黃門而即世後夫人王氏生公  
而偏愛公克諧以孝因心則友啟均養之德成無間之言  
天下之人比之祥覽惟公德行言語文學政事四者實總  
而兼之事親養志而能爭居喪過哀而顧禮此又善中之  
善者也善人天之經也國之寶也道將興廢木鐸之用有

時命或推移蒼生之望恒在春秋六十遘疾陳郡還醫洛  
師開元七年九月二日薨於歸德里有詔贈兵部尚書諡  
曰孝禮也明年某月葬於某地有子孚恒濟丈偁然在疚  
靡所寘哀以某忝縉雲之舊寮沐清風之餘論入難名之  
聞域窺妙德之形容見託銘誌庶傳精爽至於歷官次序  
平居事業當見郡府遺愛之碑國史名臣之傳故不存焉

銘曰

峨峨仁公抱孝含忠文獻則足高明有融翻飛王佐穆我  
清風道濟明時心樂幽地薛衣華袞坦然一致逍遙啟封

帶礪傳祀生涯共盡振古其常人秉三德天歸百祥臧孫  
有後公業不亡

唐故左庶子贈幽州都督元府君墓誌銘

維開元十年正月己未左庶子武陵公河南元公薨於東  
京留守之內館公諱懷景字某魏武陵王雄之曾孫右衛  
大將軍胄之孫贈麟州刺史仁惠之季子昔天啟水行君  
臨寰海雄圖長發本枝碩茂濟美象賢餘慶不隕公受茲  
介祉誕膺淑靈幼有純至之節長立公直之操學綜羣藝  
詞擅精微夫其結言以信導物以德清儉足以軌俗真厲

足以矯邪故美暢於中名揚於外弱冠以國子進士高第  
補相王府典籤藩邸擇賢妙盡時選尋以內憂去職重補  
相王府參軍及明兩昇儲作貞萬國以宮臣除太子通事  
舍人天授中以親累除名向逾一紀後除直羅溫縣二令  
雖大位未享通材必久初自太府主簿累入副卿河南掾  
曹克昇亞尹握蘭右轄綱紀南宮秉茲憲簡肅彼專席再  
侍儲華卒踐宮相公執心好直履法斷恩觸雷霆而除惡  
不避也枉絲髮而干譽不爲也外降兩宮出入三代克慎  
其始終厥有成君子以爲難允哉其難矣及啟手歸全遺

言薄葬家無長物士伏其清年過懸輿人傷其天嗚呼哀哉制贈都督幽州諸軍事幽州刺史賻悼之節優於恒數明年二月歸葬於咸陽之舊塋夫人韋氏祔焉禮也夫人即逍遙公敬遠之元孫左常侍希仲之叔姊淑行無改華年早世其孤彥仲等克遵遺訓靡及寘哀說情外如常深國士既闕西階之奠遠投東武之詞銘曰

卓彼英運慶靈既長貽訓夫子體微知章在藝斯博於欲則少徒文其中莫飾其表惟靜惟默不激不矯時經三代官成兩宮化若風偃德如澤融邦稱其直朝表其忠禮祔

周兆墳瞻漢宮哀哀純孝長訴旻穹

節愍太子妃楊氏墓誌銘

開元十有七年二月癸未中宗節愍太子妃楊氏薨於京師太平里第之內寢越五日景申詔葬於新豐之細柳原黃陵不從古之道也嗚呼哀哉妃氏之先代居河華赤泉啟國清白傳家東都之公胄西晉之后族高祖士達隋開府納言天授中以孝明高后之父追封鄭王贈太尉曾祖緘隋符璽郎抗節王充朝廷旌載贈靈州刺史祖全節左內率贈魏州刺史考知慶千牛豹韜二將軍若夫軒冕王



官同許史之繁漢婚姻帝宰比姜媿之宜周是故二華降  
靈五河飛譽拜玉冊於文廟儷金璽於青宮入參視膳之  
儀出友元真之樂禮陪蘭館祭服始於北郊詩贊鵲巢王  
化終於南國豈知言違關水神往邛山七日之望不歸千  
秋之言何及於是視身知苦幽探白馬之傷心等空生  
證青蓮之葉久以喬木無怙柏舟早誓棣華先落聖善相  
依闔門正家稱未亡而全禮高堂終養不勝哀而遂絕此  
又禮外之禮孝中之孝者也初上在東宮時妃有女娣選  
爲良媛生忠王卜者曰不宜養爰自襁褓命妃舉字及開

元正位良媛爲嬪而卒妃之視忠王也隱覲之教誨之竭  
從母之仁慈陪猶子之珍愛忠王之託妃也敬愛焉聽順  
焉生盡因心之樂沒過如母之感且夫慈懋鞠育孝思顧  
復仁叶恩親愛備恭睦成天下之百行致生人之五福斯  
蓋皇極之端國風之首者矣湖陽王當小宗之祭元妃之  
喪故喪挾兩孤而祭殷二國何必鼓吹山上遙傳慈母之  
名石闕廟中獨立少姨之像史官承詔勒銘沈碧詞曰  
太華北足長河東肘總粹陰靈妃德儲后鳴美玉佩炯光  
金鈕貴嬪長姨寵王從母永訣上賓死孝哀親顧懷孺子

忍別天人昔貞萬國今撫百神泉燈我夜宮樹他春陵麥  
秀兮漸漸隴月生兮纖纖元灞去兮無還日青門絕兮不  
可瞻石獸澀兮綠苔粘宿草殘兮白露沾園寢閉兮脂粉  
膩不知何人兮開鏡奩

唐故涼州長史元君石柱銘

并序

公諱仁惠字某河南洛陽人也昔帝軒命子爰宅幽都天  
神降祚遂荒北嶽其後日月運行雲雷經始壇場鄴洛據  
天地之圖帶礪山河建王侯之國公即魏昭成皇帝之十  
代孫中書令濮陽王順之曾孫也大父雄魏濮陽王後改

封武陵王昆吾伯嗣越在濮陽之墟瑯琊王子別封武陵  
之郡宇文朝降爲武陵公太府卿秦州總管微子去國不  
替舊章薛侯來朝於焉降等父冑隋濠豫二州刺史右衛  
大將軍襲封武陵公翼亮隋室宏濟王基有佐命之元勲  
承異朝之延賞文武藉甚貽燕深長公受金行之正性承  
冠代之隆烈幼見岐嶷夙聞聲器靈臺雲秀繩墨之宰無  
施雅韻天成金石之師何力屬隋綱弛紊神棄不歆卿族  
衣冠日失其序獨寐寤宿永懷盤澗之人藏器待時未射  
高墉之隼唐祖龍飛天宇鶴版巖林授公右千牛錄事贊

開之恩舊也高皇邑子既與盧綰同衣光武學徒則有嚴陵共宿久之以公事免爲舊州法曹又歷循州河源滑州靈昌二縣令克已爲政蠻貊化忠信之言直道與人仕已無喜愠之色永徽在歷碩真構難羣兇旣翦江界菁條帝念疲疇茲俾乂乃授公睦州雒山縣令乘舟而往下車作則江逋海盜革面來威然後簡網鳩人峻策羈吏閑田盡闢鰥寡委犬彘之餘絕澗無游豪猾屏蠶漁之氣我有禮樂達於山川鬼神物應休禎乎於鳥獸草木朝廷異之拜朝散大夫行隆州閬中令未至改授雍州渭南令觀人

設教異邑同風遷隆州司馬尋加朝散大夫守涼州都督  
府長史分乘兩蕃人康頌作化澄巴濮無侵橘柚之園教  
溢河湟不飲蒲萄之酒離歌就吳歲夢臨辰命躡修途榮  
慙厚德總章二年終於官舍春秋七十有三夫人安定梁  
氏文伯之妻君子以爲知禮孟軻之母良史稱其能賢齊  
德茂於昭塗合祔期於幽隧有子懷貞斧藻詩禮佩踐義  
方承家有馥芝蘭如也厯官右司員外郎太子舍人而罹  
事徙居復歸舊土履霜露於三紀無改素冠之行違桑梓  
於十載還守青門之田勤孝在乎追遠豐感思乎備物武

陵公之塋域今順陵柏城之內也山園有禁奉瞻靡及粵  
以聖歷二年歲次月朔別卜宅於咸陽縣肺浮原合葬焉  
公孝友純深風標峻起門無雜客家有嚴君而佐郡爲邦  
宏風邁德執法不撓去邪勿疑仲由之政事叔向之直  
豈稱論之典有關範則之容將墜仰惟代姻恭承哀託那  
有道之故事無媿蔡邕趙文子之將游永懷隨會寓詞楹  
石式題賢壘其銘曰

大哉乾元我族資始有國伊魏曰天之子皇羲姓風帝姬  
氏水創業垂統鬱乎舊史崇德象賢允也重軌貞涵玉性

潤結璇源武公之子平王之孫川流長直光氣熊渾孝深  
柏穎義重荆璠白珪比節黃金敵言行實剛簡游無諂黷  
學妙神教書能鬼哭避彼屯運盤桓空谷四海有王一旦  
明目佩此芳草遷於喬木亦旣從政淑問克宣秉心如水  
臨事如弦厯宰四邑高芬屬天元僚兩郡汪化流泉江河  
秦蜀嘉聲在焉三光西沒百川東度天道運迴人隨代故  
倏忽三紀悲涼千露帝葬橋山傍孺祖墓天斷舊域地開  
新路路即咸陽阡惟京兆坤氣雲矗長岡龍抱竈揜銅人  
瑩留石鳥塵歇徑滅山飛海少篆刻揚名亭亭華表